



Broj: 02-50-1-16-39/09

Sarajevo, 15. 12. 2009.

ZAPISNIK

39. sjednice Doma naroda

Parlamentarne skupštine Bosne i Hercegovine,

održane 15. 12. 2009. godine

Sjednica je počela u 11 sati.

Sjednicom je predsjedavao Sulejman Tihić, predsjedavajući Doma naroda Parlamentarne skupštine BiH.

Sjednici je prisustvovalo 14 delegata.

Delegat Mladen Ivanić opravdao je odsustvo.

Osim delegata, na sjednici Doma naroda bili su predstavnici: Vijeća ministara BiH, međunarodnih organizacija te sredstava javnog informiranja.

Dom naroda usvojio je sljedeći

DNEVNI RED

1. Odgovori na delegatska pitanja i delegatska pitanja;
2. Usvajanje Zapisnika 38. sjednice Doma naroda;
3. Izvještaj Zajedničke komisije oba doma o postizanju saglasnosti o istovjetnom tekstu Zakona o izmjenama i dopunama Zakona o Pravobranilaštvu Bosne i Hercegovine;
4. Izvještaj Zajedničke komisije oba doma o postizanju saglasnosti o istovjetnom tekstu Zakona o izmjenama i dopunama Zakona o sportu u Bosne i Hercegovine;
5. Zahtjev Vijeća ministara BiH za razmatranje Prijedloga zakona o izmjenama i dopunama Zakona o zaduživanju, dugu i garancijama Bosne i Hercegovine, po skraćenom postupku u skladu s članom 121. Poslovnika Doma naroda;

6. Prijedlog zakona o Agenciji za prevenciju korupcije i koordinaciju borbe protiv korupcije (drugo čitanje), predlagač: Vijeće ministara BiH;
7. Prijedlog zakona o izmjenama i dopunama Zakona o slobodi pristupa informacijama u Bosni i Hercegovini (drugo čitanje), predlagač: Predstavnički dom;
8. Prijedlog zakona o dopuni Zakona o službenom glasilu Bosne i Hercegovine (drugo čitanje), predlagač: Predstavnički dom;
9. Prijedlog zakona o općoj sigurnosti proizvoda (drugo čitanje), predlagač: Vijeće ministara BiH;
10. Prijedlog zakona o izmjenama i dopunama Zakona o nadzoru nad tržištem u Bosni i Hercegovini (drugo čitanje), predlagač: Vijeće ministara BiH;
11. Prijedlog zakona o izmjenama i dopunama Zakona o ravnopravnosti spolova u Bosni i Hercegovini (drugo čitanje), predlagač: Vijeće ministara BiH;
12. Prijedlog zakona o izmjeni Zakona o finansiranju političkih stranaka (drugo čitanje), predlagač: Vijeće ministara BiH;
13. Prijedlog zakona o izmjenama i dopunama Zakona o upravi (drugo čitanje), predlagač: Vijeće ministara BiH;
14. Prijedlog zakona o izmjenama i dopunama Zakona o ministarstvima i drugim tijelima uprave Bosne i Hercegovine (drugo čitanje), predlagač: Vijeće ministara BiH;
15. Prijedlog zakona o dopuni Zakona o plaćama i naknadama u institucijama Bosne i Hercegovine, s Mišljenjem Komsije za finansije i budžet Doma naroda, predlagač: Predstavnički dom;
16. Prijedlog zakona o izmjenama i dopunama Zakona o nestalim licima (prvo čitanje), predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku;
17. Prijedlog zakona o izmjenama i dopunama Krivičnog zakona Bosne i Hercegovine (prvo čitanje), predlagač: Vijeće ministara BiH;
18. Izvještaj sa sastanka političkih direktora država članica Jadranske povelje, održanog 20.9.2009., s Mišljenjem Zajedničke komisije za odbranu i sigurnost BiH;
19. Davanje saglasnosti za ratifikaciju Konvencije UN-a o pravima lica s invaliditetom i Opcionalnog protokola.

Ad. 1. Odgovori na delegatska pitanja i delegatska pitanja

Odgovore na delegatska pitanja dobili su:

Dušanka Majkić – na pitanje postavljeno na 21. sjednici i na pitanje postavljeno na 36. sjednici Doma

Zoran Koprivica - na pitanje postavljeno na 37. sjednici, upućeno Centralnoj banci BiH i Agenciji za bankarstvo Federacije BiH i na pitanje postavljeno na 38. sjednici Doma

Hazim Rančić - na pitanja postavljena na 21., 35. i dva odgovora na pitanje postavljeno na 37. sjednici Doma

Sulejman Tihić – na pitanje postavljeno na 38. sjednici Doma,

Slobodan Šaraba – na pitanje postavljeno na 38. sjednici Doma

Ivo Miro Jović - na pitanje postavljeno na 35. sjednici Doma

Božo Rajić - na pitanje postavljeno na 38. sjednici Doma

Adem Ibrahimpašić - na pitanje postavljeno na 37. sjednici Doma

Delegati: Dušanka Majkić, Hazim Rančić, Slobodan Šaraba, Ivo Miro Jović i Božo Rajić izjasnili su se da nisu zadovoljni dobivenim odgovorima.

Delegati Zoran Koprivica i Adem Ibrahimpašić izjasnili su se da su djelimično zadovoljni dobivenim odgovorima na postavljena pitanja.

Delegat Sulejman Tihić izjasnio se da je zadovoljan dobivenim odgovorom na postavljeno pitanje ali ne i etničkom strukturom zaposlenih na glavnim pozicijama u institucijama BiH.

U okviru odgovora na delegatsko pitanje Dušanke Majkić, postavljeno na 21. sjednici Doma naroda, u raspravi su učestvovali: Dušanka Majkić, Hilmo Neimarlija, Sulejman Tihić, Ilija Filipović, Hazim Rančić, Božo Ljubić, Božo Rajić, Slobodan Šaraba, Zoran Koprivica i Drago Ljubičić.

Delegat Dušanka Majkić predložila je da se u dnevni red sjednice uvrsti Inicijativa za osnivanje istražne komisije Doma naroda za utvrđivanje okolnosti u vezi sa izdavanjem CEMT dozvola za 2009. godinu prijevoznicima u Bosni i Hercegovini.

Delegat Hazim Rančić predložio je da se u dnevni red sjednice uvrsti Inicijativa kojom se zadužuje Vijeće ministara BiH da sačini Prijedlog zakona o postupanju Pravobranilaštva u vršenju pravobranilačke funkcije.

Dom naroda jednoglasno je usvojio zaključak da se navedene inicijative dostave prvo Kolegiju Doma naroda na razmatranje a nakon toga da se uvrste kao posebne tačke u dnevni red naredne sjednice Doma naroda.

Delegat Hazim Rančić postavio je sljedeće pitanje Ministarstvu vanjskih poslova BiH, Ministarstvu finansija i trezora BiH, Ministarstvu pravde BiH i Ministarstvu za ljudska prava i izbjeglice BiH:

S obzirom da su Inicijativom Vijeća ministara BiH, od 24.7.2008., zaduženi za izradu Strategije modaliteta načina razrješenja stare devizne štednje kod Ljubljanske banke, Invest banke Beograd i drugih nedomesticilnih banaka, zašto i nakon protoka 20 mjeseci, a rok im je bio mjesec dana, nisu sačinili i predložili Vijeću ministara BiH navedenu strategiju? Kada će predložiti Strategiju i modalitete načina razrješenja stare devizne štednje, a što su bili dužni po Zakonu o izmirenju obaveza po osnovu računa stare devizne štednje iz 2006.godine, po presudi Ustavnog suda BiH AP 164/04, od 1.4.2006., i zaključku Vijeća ministara BiH, od 24.7.2008.?

Delegat Slobodan Šaraba postavio je sljedeće pitanje Državnoj agenciji za istrage i zaštitu:
„Ko su lica u Bosni i Hercegovini kojima se pružaju usluge operativnog osiguranja“?

Delegat Zoran Koprivica postavio je sljedeće pitanje Ministarstvu pravde BiH:

Kada će se između BiH i Hrvatske, te između BiH i Srbije potpisati izmjene i dopune bilateralnog sporazuma o međusobnom izvršenju zatvorskih sankcija, kako bi se na ovim prostorima trajno onemogućilo osuđenima u ove tri države regiona da izbjegavaju kazne koje su im pravosnažno izrečene.

Evidentno je da su desetine osuđenih na zatvorske kazne pobjegle u drugu državu regiona, gdje imaju boravište i državljanstvo, te praktično izbjegli zatvor.

Potpisivanjem ovih sporazuma, u slučaju bijega, država koja izrekne kaznu može zatražiti da se ona izvrši, te će osuđeni morati izdržati kaznu u zemlji gdje se nalazi ili će se vratiti u državu u kojoj je osuđen. To je od ogromne važnosti za pravdu na ovim prostorima,

jer se već s punim pravom postavlja i pitanje ima li smisla izricati kazne na sudovima ako će osuđeni pobjeći, koristeći sadašnje stanje i pravne regulative u regionu.

Prema posljednjim informacijama, u toku su aktivnosti u vezi s potpisivanjem tog sporazuma sa Srbijom, dok se uopće ne pominje potpisivanje istog sporazuma s Hrvatskom.

Delegat Ivo Miro Jović postavio je sljedeće pitanje Vijeću ministara BiH (svim ministarstvima):

Koliko su ministarstva ispoštovala Odluku o uslovima i načinu prijema pripravnika VII. stepena stručne spreme u radni odnos u 2008. i 2009. godini?

Članom 3. stav 3. navedene odluke predviđena je obaveza svih institucija Bosne i Hercegovine da prime ne manje od 4% od ukupnog broja radnih mjesta državnih službenika i drugih zaposlenih VII. stepena stručne spreme.

Također, članom 4. iste odluke predviđeno je i primanje volontera čiji broj ne može biti veći od 10% od ukupnog broja zaposlenih VII. stepena stručne spreme.

Delegat Ivo Miro Jović postavio je sljedeće pitanje Ministarstvu vanjskih poslova BiH:

Zamjenica ministra vanjskih poslova BiH Ana Trišić-Babić izjavila je: „Srpski iz BiH nije isti kao srpski iz Srbije, hrvatski iz BiH nije isti kao hrvatski iz Hrvatske“ (misleći na jezik), ističući da BiH u Evropi neće imati „pravo na tri kabine“ za prijevod.

Čiji stav o pravu na upotrebe službenih jezika u BiH iznosi gospođa Trišić- Babić?

Koji je to hrvatski jezik u Hrvatskoj a koji hrvatski u BiH?

Koje rješenje, ovakvim stavom, gospođa nudi s ciljem unitarizacije BiH, jedan narod, jedan jezik, jedna država?

Delegat Ivo Miro Jović postavio je sljedeće pitanje OHR-u, Centralnoj izbornoj komisiji BiH i Vladi Federacije BiH:

Kada će prestati kršenje Ustava FBiH u Općini Gradačac i realizirati rješenje, „ne mogu načelnik i predsjedavajući općinskog vijeća biti iz istog naroda“, što je sada slučaj?

Naime, Amandman 54. na Ustav FBiH, od 15.IV 2004., član 6. stav 3. tačka 5. jasno precizira ovu obavezu na nivou općina. Naime, po popisu stanovništva 1991. godine, u Općini Gradačac živjelo je od ukupno 56.000 stanovnika od kojih je 59% bilo Bošnjaka,

19% Srba, 15% Hrvata i 5% Jugoslavena. Poslije lokalnih izbora 2008. godine, za načelnika Općine Gradačac izabran je Adem Hamić (Bošnjak), što je nužno tražilo da predsjedavajući Općinskog vijeća bude iz drugog konstitutivnog naroda, ali je izabran Fadil Imširević (Bošnjak).

Delegat Božo Ljubić postavio je sljedeće pitanje Ministarstvu za ljudska prava i izbjeglice BiH, Ministarstvu za civilne poslove BiH i Vladi Republike Srpske:

Što ove nadležne institucije i druge institucije rade da se podstakne i osigura održiv povratak prognanika i izbjeglica u Republiku Srpsku, odnosno što čine da se spriječe opstrukcije povratka i ostvarivanja prava povratnika posebno u općinama Bosanske Posavine?

Delegat Božo Ljubić postavio je sljedeće pitanje Ministarstvu za ljudska prava i izbjeglice BiH, Vladi Republike Srpske i Narodnoj skupštini Republike Srpske.

Što ove institucije čine da se osigura neotuđivo pravo na imovinu prognanika i izbjeglica iz RS-a koji se iz raznoraznih razloga nisu vratili, ne mogu se vratiti i zbog toga nisu u stanju koristiti svoju imovinu, posebno zemljišne posjede a zakon ih prisiljava da plaćaju porez na tu imovinu s mogućnošću da je i izgube?

Delegat Božo Ljubić postavio je sljedeće pitanje Ministarstvu komunikacija i prometa BiH:

Da li je prilikom raspodjele CEMT i bilateralnih dozvola koje se dobivaju od drugih država za 2009. bilo primjene selektivnih kriterija u odnosu na prijevoznike iz dva entiteta, odnosno da li su eventualno time prijevoznici iz jednog entiteta bili favorizirani ili oštećeni u odnosu na prijevoznike iz drugog entiteta.

Ad. 2. Usvajanje Zapisnika 38. sjednice Doma naroda

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je usvojio Zapisnik 38.** sjednice Doma naroda.

Ad. 3. Izvještaj Zajedničke komisije oba doma o postizanju saglasnosti o istovjetnom tekstu Zakona o izmjenama i dopunama Zakona o Pravobranilaštvu Bosne i Hercegovine

Predsjedavajući Doma naroda otvorio je raspravu o ovoj tački dnevnog reda. U raspravi je učestvovao Hilmo Neimarlija.

Dom naroda **jednoglasno je usvojio** Izvještaj Zajedničke komisije oba doma o postizanju saglasnosti o identičnom tekstu Zakona o izmjenama i dopunama Zakona o Pravobranilaštvu Bosne i Hercegovine, pa je samim tim Zakon **usvojen**.

Ad. 4. Izvještaj Zajedničke komisije oba doma o postizanju saglasnosti o istovjetnom tekstu Zakona o izmjenama i dopunama Zakona o sportu u Bosne i Hercegovine

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je usvojio** Izvještaj Zajedničke komisije oba doma o postizanju saglasnosti o identičnom tekstu Zakona o izmjenama i dopunama Zakona o sportu u Bosni i Hercegovini, pa je samim tim Zakon **usvojen**.

Ad. 5. Zahtjev Vijeća ministara BiH za razmatranje Prijedloga zakona o izmjenama i dopunama Zakona o zaduživanju, dugu i garancijama Bosne i Hercegovine, po skraćenom postupku u skladu s članom 121. Poslovnika Doma naroda

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda je, s **jedanaest glasova „za“ i jednim „suzdržanim“ glasom , usvojio** Zahtjev Vijeća ministara BiH za razmatranje Prijedloga zakona o izmjenama i dopunama

Zakona o zaduživanju, dugu i garancijama Bosne i Hercegovine, po skraćenom postupku u skladu s članom 121. Poslovnika Doma naroda.

Ad. 6. Prijedlog zakona o Agenciji za prevenciju korupcije i koordinaciju borbe protiv korupcije (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Ivo Miro Jović, Zoran Koprivica, Hazim Rančić, Božo Rajić i Dušanka Majkić.

Dom naroda je, s **13 glasova „za“ i jednim glasom „protiv“**, usvojio Zakon o Agenciji za prevenciju korupcije i koordinaciju borbe protiv korupcije sa sljedećih **11** amandmana:

Amandman I.

Član 2. mijenja se i glasi:

„Član 2.

(Definicija korupcije)

U smislu ovog zakona, korupcija označava svaku zloupotrebu moći povjerene javnom službeniku ili licu na političkom položaju na državnom, entitetskom, kantonalnom nivou, nivou Brčko Distrikta Bosne i Hercegovine, gradskom ili općinskom nivou, koja može dovesti do privatne koristi. Korupcija posebno može uključivati direktno ili indirektno zahtijevanje, nuđenje, davanje ili prihvatanje mita ili neke druge nedopuštene prednosti ili njenu mogućnost, kojima se narušava odgovarajuće obavljanje bilo kakve dužnosti ili ponašanja očekivanih od primaoca mita“.

Amandman II.

U članu 3. (Značenje izraza), u tački c) iza riječi „entiteta“ dodaju se riječi: „kantona, Brčko Distrikta Bosne i Hercegovine, grada ili općine“, a ostali teksta briše se.

Amandman III.

U članu 6. stav (3) mijenja se i glasi:

„ (3) Sjedište Agencije utvrdit će Vijeće ministara Bosne i Hercegovine u roku od tri mjeseca od dana stupanja na snagu ovog zakona.“

Amandman IV.

U članu 12. stav (2) iza riječi: „Direktor ima“ dodaje se riječ „dva“.

Amandman V.

U nazivu člana 13. riječi: „i zamjenika“ brišu se.

Amandman VI.

U članu 13. stav (1) na kraju teksta brišu se riječi: „(„Službeni glasnik BiH“, broj 37/03)“, a umjesto tačke dodaje se zarez i riječi: „uz provjere koje se primjenjuju prilikom imenovanja Vijeća ministara Bosne i Hercegovine“.

Amandman VII.

U članu 14. stav (3) briše se.

Amandman VIII.

U članu 16. naziv člana mijenja se i glasi: „Zamjenici direktora Agencije“.

U članu 16. riječ „zamjenika“ mijenja se riječju „zamjenike“.

Amandman IX.

U članu 17. stav (1) mijenja se i glasi:

„(1) Komisija za izbor i praćenje rada Agencije (u daljnjem tekstu: Komisija) ima devet članova: tri predstavnika iz Predstavničkog doma Parlamentarne skupštine BiH, tri predstavnika iz Doma naroda Parlamentarne skupštine BiH, dva predstavnika akademske zajednice i jedan predstavnik nevladinog sektora“.

U članu 17. stav (2) mijenja se i glasi:

„(2) Komisiju imenuje Parlamentarna skupština Bosne i Hercegovine.“

St. (3), (4) i (5) člana 17. ostaju nepromijenjeni.

Amandman X

U članu 22. (Obaveza razvijanja politike) iza riječi „Entiteti“ dodaje se riječi „kantoni“.

Amandman XI.

U članu 23. (Obaveza određivanja tijela za suzbijanje korupcije) u stavu (1) iza riječi „Entiteti“ dodaje se zarez i riječ „kantoni“.

S obzirom da je Zakon usvojen u različitom tekstu od onog usvojenog u Predstavničkom domu, Dom naroda osnovao je Komisiju za usaglašavanje teksta Zakona. Za članove Komisije iz Doma naroda **imenovani su: Hazim Rančić, Ivo Miro Jović i Zoran Koprivica.**

Ad. 7. Prijedlog zakona o izmjenama i dopunama Zakona o slobodi pristupa informacijama u Bosni i Hercegovini (drugo čitanje), predlagač: Predstavnički dom

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Dušanka Majkić, Ivo Miro Jović, Zoran Koprivica, Branko Zrno, Slobodan Šaraba i Ilija Filipović.

"Za" Prijedlog zakona glasalo je 11 delegata a tri su bila „suzdržana“. S obzirom da u prvom krugu glasanja nije bilo entitetske većine, obavljeno je usaglašavanje u Kolegiju Doma kao komisiji (nije bilo saglasnosti). Potom je u drugom krugu glasanja, **s 11 glasova „za“ i tri „suzdržana“ glasa, usvojen Zakon** o izmjenama i dopunama Zakona o slobodi pristupa informacijama u Bosni i Hercegovini, čiji je predlagač Predstavnički dom.

Ad. 8 Prijedlog zakona o dopuni Zakona o službenom glasilu Bosne i Hercegovine (drugo čitanje), predlagač: Predstavnički dom

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali Ivo Miro Jović i Dušanka Majkić.

Dom naroda **jednoglasno je usvojio** Zakon o dopuni Zakona o službenom glasilu Bosne i Hercegovine sa sljedećim amandmanom.

Amandman I.

Član 5a. mijenja se i glasi:

„Član 5a.

Zakoni i podzakonski akti objavljeni u "Službenom glasniku BiH" objavljuju se i na veb-stranici "Službenog glasnika BiH" i besplatno su dostupni javnosti“.

S obzirom da je Zakon usvojen u različitom tekstu od onog usvojenog u Predstavničkom domu, Dom naroda osnovao je Komisiju za usaglašavanje teksta Zakona. Za članove Komisije iz Doma naroda **imenovani su: Zoran Koprivica, Ivo Miro Jović i Hilmo Neimarlija.**

Dom naroda usvojio je sljedeći zaključak:

Zadužuje se Vijeće ministara BiH da u što kraćem roku u parlamentarnu proceduru dostavi Prijedlog zakona kojim se regulira pravni status Službenog lista BiH.

Ad. 9. Prijedlog zakona o općoj sigurnosti proizvoda (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi je učestvovao Božo Ljubić.

Dom naroda **jednoglasno je usvojio** Zakon o općoj sigurnosti proizvoda u identičnom tekstu kao i Predstavnički dom.

Ad. 10. Prijedlog zakona o izmjenama i dopunama Zakona o nadzoru nad tržištem u Bosni i Hercegovini (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali Božo Ljubić i Alma Čolo.

Dom naroda **jednoglasno je usvojio** Zakon o izmjenama i dopunama Zakona o nadzoru nad tržištem u Bosni i Hercegovini u identičnom tekstu kao i Predstavnički dom.

Ad.11. Prijedlog zakona o izmjenama i dopunama Zakona o ravnopravnosti spolova u Bosni i Hercegovini (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Ivo Miro Jović, Božo Rajić, Ilija Filipović, Dušanka Majkić i Božo Ljubić.

Dom naroda **jednoglasno je usvojio** Zakon o izmjenama i dopunama Zakona o ravnopravnosti spolova u Bosni i Hercegovini u identičnom tekstu kao i Predstavnički dom.

Ad.12. Prijedlog zakona o izmjeni Zakona o finansiranju političkih stranaka (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda je, **s 13 glasova „za“ i jednim glasom „protiv“**, usvojio Zakon o finansiranju političkih stranaka u identičnom tekstu kao i Predstavnički dom.

Ad.13. Prijedlog zakona o izmjenama i dopunama Zakona o upravi (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi je učestvovao Ivo Miro Jović.

Dom naroda **jednoglasno je usvojio** Zakon o izmjenama i dopunama Zakona o upravi u identičnom tekstu kao i Predstavnički dom.

Ad.14. Prijedlog zakona o izmjenama i dopunama Zakona o ministarstvima i drugim organima uprave Bosne i Hercegovine (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Ivo Miro Jović, mr. Alma Čolo, Hazim Rančić, Božo Rajić i Bariša Čolak, ministar pravde.

Dom naroda je, **s devet glasova „za“, četiri glasa „protiv“ i jednim „suzdržanim“ glasom, usvojio** Zakon o izmjenama i dopunama Zakona o ministarstvima i drugim organima uprave Bosne i Hercegovine u predloženom tekstu.

S obzirom da je Zakon u Predstavničkom domu usvojen s jednim amandmanom, Dom naroda osnovao je Komisiju za usaglašavanje teksta Zakona. Za članove Komisije iz Doma naroda **imenovani su: Alma Čolo, Ivo Miro Jović i Zoran Koprivica.**

Ad.15. Prijedloga zakona o dopuni Zakona o plaćama i naknadama u institucijama Bosne i Hercegovine, s Mišljenjem Komsije za finansije i budžet Doma naroda, predlagač: Predstavnički dom

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Dušanka Majkić, Hazim Rančić, Ivo Miro Jović i Božo Rajić.

Dom naroda je, **s 11 glasova „za“, jednim glasom „protiv“ i dva „suzdržana“ glasa, usvojio negativno** Mišljenje Komisije za finansije i budžet pa je samim tim Prijedlog zakona o dopuni Zakona o plaćama i naknadama u institucijama Bosne i Hercegovine čiji je predlagač Predstavnički dom **odbijen**.

Ad.16. Prijedlog zakona o izmjenama i dopunama Zakona o nestalim licima (prvo čitanje), predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Zoran Koprivica, Dušanka Majkić, Alma Čolo, Drago Ljubičić i Božo Rajić.

"Za" Prijedlog zakona glasalo je deset delegata iz Federacije BiH a četiri delegata iz Republike Srpske glasala su „protiv“. S obzirom da u prvom krugu glasanja nije bilo entitetske većine, obavljeno je usaglašavanje u Kolegiju Doma kao komisiji (nije bilo saglasnosti). Potom u drugom krugu glasanja, **s deset glasova „za“ iz Federacije BiH i četiri glasa „protiv“ iz Republike Srpske**, Dom naroda **nije usvojio u prvom čitanju** Prijedlog zakona o izmjenama i dopunama Zakona o nestalim licima.

Ad.17. Prijedlog zakona o izmjenama i dopunama Krivičnog zakona Bosne i Hercegovine (prvo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Ivo Miro Jović, Bariša Čolak ministara pravde, Slobodan Šaraba, Alma Čolo, Dušanka Majkić, Branko Zrno, dr. Hilmo Neimarlija, Zoran Koprivica i Božo Ljubić.

Dom naroda, s **13 glasova „protiv“ i jednim „suzdržanim“ glasom, nije usvojio** Mišljenje Ustavnopravne komisije o Prijedlogu zakona o izmjenama i dopunama Krivičnog zakona Bosne i Hercegovine, pa slijedi ponovno razmatranje principa predloženog zakona i dostavljanje novog mišljenja.

Ad.18. Izvještaj sa sastanka političkih direktora država članica Jadranske povelje, održanog 20.9.2009., s Mišljenjem Zajedničke komisije za odbranu i sigurnost BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali Branko Zrno i Dušanka Majkić.

Dom naroda **jednoglasno je usvojio** Izvještaj sa sastanka političkih direktora država članica Jadranske povelje, održanog 20.9.2009.

Dom naroda **jednoglasno je** usvojio sljedeći zaključak:

1. Predlaže se da zemlje Jadranske povelje u ISAF misiju šalju zajedničke vojne snage, medicinske timove, timove za deminiranje i sl.;
2. Predlaže se razmatranje mogućnosti prihvatanja pripadnika vojnih i policijskih snaga Afganistana za obuku u certificiranim PFP centrima u zemljama članicama Jadranske povelje (BiH i Republika Hrvatska);
3. Inicira se razmjena državnih službenika između zemalja članica Jadranske povelje kako bi se došlo do razmjene i unapređenja konkretnih znanja i iskustava u integracionom procesu u NATO;
4. Predlaže se razmatranje inicijative proširenja Jadranske povelje na Republiku Srbiju i Republiku Sloveniju.
5. Daje se podrška Republici Makedoniji u procesu rješavanja njenog spora s Grčkom, te u tom smislu treba pripremiti zajedničku izjavu za ministarski sastanak zemalja članica Jadranske povelje.

Ad.19. Davanje saglasnosti za ratifikaciju Konvencije UN-a o pravima lica s invaliditetom i Opcionalnog protokola

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Božo Ljubić, Dušanka Majkić, Ilija Filipović, Ivo Miro Jović Drago Ljubičić, Zoran Koprivica i Sulejman Tihić.

Dom naroda **jednoglasno je dao** saglasnost za ratifikaciju Konvencije UN-a o pravima lica s invaliditetom i Opcionalnog protokola i usvojio, **sa sedam glasa „za“ (tri glasa iz Republike Srpske i četiri glasa iz Federacije BiH) i šest glasova „protiv“**, sljedeći zaključak:

1. Dom naroda Parlamentarne skupštine BiH zadužuje Vijeće ministara BiH da na sljedećoj sjednici Doma naroda podnese informaciju o razlozima kašnjenja ratifikacije Konvencije UN-a o pravima lica s invaliditetom i Opcionalnog protokola.
2. Dom naroda Parlamentarne skupštine BiH zadužuje Vijeće ministara BiH da, u roku od 15 dana, Domu naroda podnese informaciju o razlozima kašnjenja ratifikacije i drugih konvencija.

Sjednica je završena u 15,40 sati.

Sastavni dio ovog zapisnika je neautorizirani transkript 39. sjednice Doma naroda.

**SEKRETAR
DOMA NARODA**

Marin Vukoja,s.r.

**PREDSJEDAVALJUĆI
DOMA NARODA**

Sulejman Tihić,s.r.